



Broj: 03-04-02-28209/22  
Sarajevo, 10.08.2022. godine

**SKUPŠTINA KANTONA SARAJEVO**  
gosp. Elvedin Okerić, predsjedavajući Skupštine

**PREDMET: Odgovor na zastupničku inicijativu zastupnice Admele Hodžić, dostavlja se –**

**VEZA: Vaš akt, broj: 01-04-26971-16/22 od 07.07.2022. godine**

Zastupnica Admela Hodžić je na 53. Radnoj sjednici Skupštine Kantona Sarajevo, održanoj dana 06.07.2022. godine, u okviru tačke Dnevnog reda "Poslanička/zastupnička pitanja, inicijative i odgovori", a u skladu sa članom 213. stav 1. Poslovnika Skupštine Kantona Sarajevo, uputila zastupničku inicijativu Ministarstvu pravde i uprave u kojoj se, između ostalog, od ovog ministarstva traži detaljno pojašnjenje *koje se odnosi na odgovor na pitanje kolege Harisa Zahiragića, koje je postavio na 45. radnoj sjednici Skupštine Kantona Sarajevo, održanoj 06.12.2021. godine, na tački dnevnog reda Nacrt Zakona o izmjenama i dopunama Zakona o prijavljivanju i postupku provjere podataka o imovini nosioca javnih funkcija u Kantonu Sarajevo, kada je postavio pitanje: Zašto se kažnjava osoba koju je ostavio bliski srodnik, odnosno roditelj, i nema niti jednog podatka o njemu koji bi mogao unijeti u obrazac za prijavu imovine, te će zbog toga dobiti prekršajnu prijavu?*

S obzirom da je Ministarstvo dalo odgovor da *"navedeni slučaj predstavlja izuzetak, a ne pravilo"*, predmetnom inicijativom se traži *"pojašnjenje za ova dva termina"*, te da se na stranici Ministarstva objavi pojašnjenje: *"Koji građani spadaju u slučajeve koji predstavljaju izuzetke i koji će usljed nemogućnosti popunjavanja svih podataka bliskih srodnika biti suočeni sa sudskim postupkom po prekršajnoj prijavi i one koji predstavljaju pravilo i neće biti suočeni sa sudskim postupkom po prekršajnoj prijavi?"*

S tim u vezi, Ministarstvo pravde i uprave ističe kako slijedi:

U članu 1. stav (2) Zakona o prijavljivanju i postupku provjere podataka o imovini nosioca javnih funkcija u Kantonu Sarajevo ("Službene novine Kantona Sarajevo", br. 18/19 i 12/22) propisana je obaveza dostavljanja podataka o imovini bliskih srodnika nosilaca javnih funkcija i lica koja žive u zajedničkom domaćinstvu sa nosiocima javnih funkcija.

Kada su u pitanju propisi koji za predmet imaju prevenciju korupcije, praksa je, u skladu sa međunarodnim standardima i smjernicama koje se odnose na oblast prevencije korupcije, da se u ovim propisima utvrde određene obaveze i u vezi sa bliskim srođnicima nosilaca javnih funkcija, s



obzirom da se, prema relevantnim izvještajima, koruptivne aktivnosti u velikom broju slučajeva vrše upravo u korist bliskih srodnika nosilaca javnih funkcija.

Mogućnost neprikladnosti nekog općeg zakonskog pravila za sve posebne pojedinačne slučajeve (kao što je slučaj naveden u predmetnoj inicijativi, prema kojem se "kažnjava osoba koju je ostavio bliski srodnik, odnosno roditelj", a ta osoba "nema niti jednog podatka o njemu") rješava se u procesu primjene propisa od strane organa koji postupaju u konkretnoj situaciji, uzimajući u obzir da određenu zakonsku normu, koja je izvor prava i osnov za odlučivanje, prilagodi pojedinačnom slučaju i da je za taj slučaj učini pravičnom.

S tim u vezi, kada nosilac javne funkcije iz objektivnih razloga nije u posjedu ili ne može pribaviti informacije koje se odnose na imovinu njegovih bliskih srodnika, praksa je da nosilac javne funkcije dostavlja Uredu za borbu protiv korupcije i upravljanje kvalitetom Kantona Sarajevo potpisanu i od strane nadležnog organa ovjerenu izjavu da ne raspolaže podacima o imovini bliskog srodnika, koju Ured za borbu protiv korupcije i upravljanje kvalitetom Kantona Sarajevo uzima u obzir u daljem postupku.

Slijedom navedenog, prekršajni postupak se ne pokreće protiv nosioca javne funkcije koji ne dostavi podatke o imovini bliskih srodnika, a za kojeg se, na naprijed navedeni način, utvrdi da ne raspolaže ili da nije u mogućnosti pribaviti podatke o imovini bliskih srodnika.

S poštovanjem,

Dostaviti:

1. Naslovu;
2. Stručna služba Vlade;
3. a/a.



**Darja Softić Kadenić**